

四庫全書

集部

欽定四庫全書

集部

中州集卷七

詳校官中書

臣呂光復

助教臣常循覆勘

總校官編修

臣

王燕緒

校對官學正

臣

翁樹棠

謄錄監生

臣

周學淮

欽定四庫全書

中州集卷七

金元好問編

蘭泉先生張建

二十三首

建字吉甫蒲城人明昌初舉才行授絳州教官召  
為宮教應奉翰林文字以老乞身道陵愛其淳素  
不欲令去左右眷眷久之超同知華州防禦使事  
仍賜詩有從今畫錦蓮峰下三樂休誇榮啓期之

句士林榮之吉甫自號蘭泉老人有集行於世其  
論詩云作詩不論長篇短韻須要詞理具足不欠  
不餘如荷上洒水散為露珠大者如豆小者如粟  
細者如塵一一看之無不圓成始為盡善吉甫詩  
雖不能盡如所言然亦未為無所得也

擬古十首

飛雲何冉冉高與日月齊中有兩仙人盛服持玉圭我  
欲從之游天險不可躋邈焉望不及短日西山西

又

客從岳頂來貽我松粉黃為言服之久身輕欲飛翔我  
嘗淡無味我嗅寂無香還君三太息世好方膏粱

又

枯桑依頽垣摧折生理微剥我枝間葉備君身上衣葉  
盡誰復顧棲鳥來亦稀君看牡丹鼓日日笙歌圍

又

青青河濱柳柯葉柔且妍一從智巧萌戕賊為枉棬器

成豈不佳天質失自然爭如河堤上濯濯披春烟

又

石泉何清冷中有九節蒲蒲性本孤潔不受滓穢汙一  
移入城市生意寄泥淤翠葉日焦卷不霜而自枯寄言  
守靜者勿涉奔競途

又

庭前蘭蕙窠三年種不成門外旱蒺藜一旦還自生第  
恐傷我足鋤去根與萌如何一雨後走蔓復縱橫

又

有客曳長裾袖刺謁高閤低頭拜閤者始得通姓名主人果厚眷開宴海陸并顧必承彼顏語必順彼情不如茅簷下飽我藜藿羹

又

莽莽嶧山桐一樹十二枝枝分十二律所指各不移胡為師襄子獨謂東南奇一律不可闕一枝不可遺誰能以此意說似典樂變

又

美人何熒熒，顏若茗之英。絕世而獨立，一顧傾人城。三星正當戶，俟我亦在庭。之子無良媒，不敢犯露行。

又

丘中有一士，顏貌清且癯。緼袍僅蔽體，蔬飯不滿盂。時出蓬蓽門，鼓腹歌黃虞。不知何所得，矯首望八區。

山中

林櫻墮紅珠，打着琴上絃。山人時一笑，愛此聲琅然。



韓信廟

一檄風馳萬壘降當時意趣已難量既能歸漢識真主  
何必下齊求假王將幄深巖巖樹碧門旌搖曳嶺雲黃  
我詩責備春秋法勝把君侯美處揚

送張子玉

渭水玻璃碧秦山劍戟明秋光如我瘦行色與君清蟬  
嘒西風柳鴉翻落日城歸舟幸無物且莫苦貪程

梨花

蠹樹枝高茁朶稠嫩苞開破雪搓毬碎粘粉紫鬚齊吐  
潤卷丹黃葉半抽月影曉窓留好夢雨聲深院鎖清愁  
瓊胞已實香猶在散入長安賣酒樓

長安酒家  
有梨花樓

答華陰宋先覺

雲臺清集憶當年詩筆逢君厭老拳後會邈如千里遠  
壯懷不似十年前風帘搖曳橋南酒烟樹溟濛渭北天  
咫尺靈山飛不到夢魂長繞玉峰蓮

送賀彥淳還南邠

玉峰明滅暮雲邊  
默計歸程約半千  
襁負尚憐靈照幼  
家貧賴有孟光賢  
臨歧淚眼三年別  
夾路風槐六月天  
佇立望君西去遠  
夕陽村落起孤烟

山村風雨圖

雨昏山店望未見  
風緊傘簷張不開  
莫訝披圖便成句  
為曾行到此中來

吉甫又嘗有詩云風卷旱塵撓馬過雲移涼影趁人行其寫目前之景甚

與山村風雨詩  
相侶今附於此

賦胡直之溪橋蓮塘二首

漁父詞體

溪橋脚下水平分橋柱萍粘浪打痕天向晚日攬昏雨  
簇青烟斷岸村

又

拂拂輕風漾翠瀾粉媒新撲小荷盤塘水漲岸痕漫草  
閣臨流五月寒

雜詩二首

瓦竝擔山泉石鼎煮巖菊燎以松桂枝清芬滿茅屋

又

踏雪尋梅花雪梅同一色不是暗香來梅花尋不得

俊師定庵

渟泓石上泉照我良是我輕風一蕩激真態互掀簸乃  
知求慧性非戒定未可道人此名庵千劫付一坐海月  
自澄明天花任飛妥吾生劇萍梗萬里信漂墮湛然摩  
尼珠坐受昏塵裏何時陪遠公同社事香火

送王主簿還鄉

笑君習氣只書生薄有歸裝亦自清瘦僕擔詩雙籠重

羸牛引輓一車輕長亭已過那知遠別酒猶多未忍傾  
記取明年斷腸處玉梨花底月三更

張瓚一首

瓚字器之河中人才氣超邁時輩少見其比年未  
二十以鄉試魁陝西河東不幸早世張吉甫弔之  
云惜哉器之真大夫少年讀徧天下書一事不成  
死於途苗而不秀有矣夫秀而不實有矣夫其為  
名流所嗟惜如此

游棲巖寺

林表招人白塔明竹間蘭芷石泉清惠崇水墨西軒景  
烟帶平蕪水帶城

毛宮教麾

七首

麾字牧達平陽人大定十六年舉學行特賜進士  
出身授校書郎入教宮掖歷太常博士終于同知  
沁州軍州事有平水集行于世

無題

小顰對起石州山楊柳分青入髻鬟乍識春風眼如鵲  
為誰無語獨凭闌

游河西孫氏園

亭榭依山水亂鳴已如卷畫障中行照溪芳樹紅雲合  
迎客幽禽翠羽輕豪氣未饒金谷友醉魂如到錦官城  
猶慙歸騎忽忽去不得持杯待月明

魏城馬南瑞以異香見貽且索詩為賦二首

梅心蘭甲類元同氣壓荀家百和功借潤更煩纖手玉



出雲初試博山銅  
崇朝日下亭亭蓋  
三月花間細細風  
我有因緣在香火  
鼻端消息為君通

又

二卉真香豈復加  
便宜編譜入雄誇  
留殘一點薔薇水  
幻出諸天薝蔔花  
佩帶正垂金鈿小  
薰爐孤起翠雲斜  
金籠甲帳豪華事  
慙愧桑樞甕牖家

新春雪與韓府推

春到千門氣自嘉  
更教飛雪助年華  
六街官柳枝枝絮

金  
卷七  
一夜江梅樹樹花，況是縱吟多伴侶。直須爛醉作生涯，  
掃庭迎客東風裏。幕府風流有故家。

和思達兄杏花

碎剪明霞役化工，曉園香散暖煙中。羞逢柳眼三眠白，  
分得桃腮一笑紅。上苑繁華迷故國，曲江顛顚老春風。  
欲傳此恨花無語，強對芳時作醉翁。

春賞

潤入梅天雨乍晴，喚回春意有新鶯。雲霞照眼青山近，

羅綺吹香白晝明  
翠勺銀罌沽酒市  
暖風遲日賣花聲  
人人共喜華胥世  
何用鼇頭羨錦城

朱宮教瀾

三首

瀾字巨觀霖堂先生之子學問該洽能世其家大  
定二十八年進士時年已六十意氣不少衰歷諸  
王大學應奉翰林文字終於待制党趙推挽之力  
為多以嘗入教宮掖故集中多宮詞

寒食不出

金瓶梅詞話卷之七  
地偏無客過吾廬寒食清明入燕居驥子捧甌仍臘茗  
孟光舉按只春蔬蠅沾香篆渾傷字蜂蹙瓶花半墮書  
習氣未除還自笑却將佳節付三餘

黃筌雀蝶

饑雀喧爭蛺蝶孤錦宮城闕見丘墟老筌妙意誰知解  
丹粉圖中有諫書

宮詞

太一芙蓉上下天秋波澹澹白生烟採蓮宮女分花了

笑把蘭篙學刺舡

姑汾漫士王琢

六首

琢字器之平陽人與毛牧達同時相友善天性孝  
友為鄉里所稱酷嗜讀書往往手自抄寫家素貧  
乏而能以剛介自持未嘗有所丐貸時命不偶年  
四十五以病卒士論惜之有姑汾漫士集行于世  
所著中聖人賦今世少有能到者詩好押強韻務  
以馳騁為工七月十五夜看月云歷樹有驚鵲悄

鄰無吠犬對雨云春雨薄如夢曉雲閒似愁秋霖  
云窻寒知氣重人靜覺泥深驟雨云電點撒冰彈  
電光飛火繩春陰云庭澹梨花月樓寒燕子風久  
雨云練挂遮簷直麻懸到地齊此類甚多

元夜雪

寶燈樓閣澹連雲轉盼俄驚糝玉塵遊伎行歌俱失意  
蔬畦麥壠自知春良宵不肯平平過造物應誇着着新  
獨有中天端正月一尊梅影屬閒人

和張仲宗雪詩不用體物諸字

天人應卜歲出此當佳占無巧穿幽隙堆寒壓短檐閒  
門誰擁簞醉館自開簾比興非無物詩人正避嫌

同漕使趙中憲對雪

投隙穿窻苦見侵向無湘酎若為禁花多不入貧家眼  
歲好方知造物心躍馬共思追兔跡抱戈誰與置羊斟  
新詩與雪爭奇峭擁褐空齋得細吟

又一詩南華夢好  
初飛蝶開苑春閒

又落花似勝前詩恨  
終篇不能完好耳

癸酉歲大熱

似動不動雲蒸空欲雨未雨天無風時時日脚蹴雲破  
一射萬土紅爐中纖絺挂體劇重鎧大屋僅可為樊籠  
積冰為丘坐自潰輕箠况得微涼通山林亦聞有喝死  
城市偪側宜無容吾生於熱亦屢度此熱盡可并前鎔  
雖然一氣播常令頓作駭異疑非公曾聞天南有祝融  
出入毒霧騎雙龍自從鼎去昧神怪無乃煽處行心胸  
手搖斗柄酌炎海力逐燥怒乘離宮喜為鬱蒸怒為火



流爍金石乾河洪熾昌自欲弄朱夏驕蹇未肯官炎農  
霞烟灼灼燥昏曉鳥獸喘喘茫西東此而不制滿三伏  
遂恐百物隨枯蓬太白之兵攢萬鋒銀河之浪滔無窮  
可洗虐焰夷姦凶我欲呼憇煩神功耿耿九虎天闕重  
辛未九月二十一日雪

幾日西郊霧連宵北牖風菊花猶汎酒雪片忽填空草  
樹秋容失河闕曉氣濛聽初疑落葉仰不辨高鴻爛漫  
三冬意憑凌百圃功披裘赴雞黍徑惜籬鼓豈料玄

金  
卷七  
英巧來爭白帝雄剪裁渾草草飛舞太忽忽祗作干時  
令非闕兆歲豐冬雷恠相似春電冷應同安得蛟龍蟄  
何由翳靄通日華升赤壁天色湛青銅尚有登臨興寧  
無賦詠工烟霞狂醉嘯一發醉顏紅

雨夕感寓

漠漠初燈後森森細點飄繁聲入遙夜冷簟恍秋宵起  
欲吟相和吁無客可招何曾洗兵馬但覺漏薪莠雷電  
初無預炎蒸遂不驕瀉檐鏘未歇欹枕兀無聊澗已山

輸漵堤應水沒橋長林倦今夕孤鳥撼驚條似我經憂  
戚因貧墮寂寥避人猶虺蜴擇宿等鷦鷯共世難曹禰  
無才匹管蕭苦心還自笑未俗本多器未老愁摧鬢長  
饑帶臃腰牀寒少陵被飲陋子淵瓢射策初游漢潛山  
敢傲堯鹽車竟垂耳風鷁忘干霄一室元空埽千鍾豈  
易要芳蘭逼憔悴尺鷃失逍遙字對諸生識詩煩衆手  
琯搜求勞腎胃戛擊謝咸韶舊弄新絃掩窮途拙目搖  
爭為壯夫篆只使古風澆血指甘時巧包羞愴道消優

游能卒歲三四儘論朝故慢幽霖透長檠暗燼挑不辭  
墻出菌僮見穀抽苗饕飮貪夫腹翻騰樂歲謠晴樓交  
燕雀涼樹沸蟬蛭坐快虹蜺出憂無萍梗漂浩歌彌激  
烈興在海門潮

呂中孚

九首

中孚字信臣冀州南宮人孝友純至迄今為鄉人  
所稱累舉不第以詩文自娛有清漳集行於世其  
賦紅葉云張園多古木蕭寺半斜陽先君子甚愛

之

小景

青蘼平野四圍山  
山郭依依紫翠間  
村遠路長人去少  
一竿斜日酒旗閒

春月

柳塘漠漠暗啼鴉  
一鏡晴飛玉有華  
好是夜闌人不寐  
半庭寒影在梨花

水聲

長陂千頃碧淙淙浪卷秋風過石砭記得夜來愁聽處  
一燈明滅照寒窓

雪

隨風拂拂玉花飄入夜寒窓更寂寥爐火已殘燈未燼  
一簾疎竹白蕭蕭

送李嘉甫信都令耘甫之弟

溪水碧於草溪邊送客行寫詩傳別意把酒聽歌聲去  
路青天遠歸心白羽輕尊前折楊柳一一是離情

寫懷

秦川西去遠不意過漳川歸夢三千里  
羈愁二十年謀生空白髮行路若青天  
餘事休相問相留只醉眠

梨花

等待清明得得芳團枝晴雪暖生香  
洗粧自有風流態却笑紅深睡海棠

集句

騷人吟罷起鄉愁百感中來不自由  
一種人間太平日

滿衣塵土避公侯

柳

風外絲絲裊綠烟  
輕花初破不成綿  
却嫌官路逢寒食  
惱亂離愁似去年

王元節

三首

元節字子元弘州人祖山甫遼戶部侍郎父誨海陵朝左司員外郎子元壻於南山翁傳其賦學第進士雅尚氣節不能從俗俯仰故仕不達既罷密



州觀察判官即閒居鄉里以詩酒自娛號遯齋老  
人年五十餘卒弟元德亦第進士有能名於時終  
於南京路提刑使

青塚

環珮魂歸青塚月琵琶聲斷黑山秋漢家多少征西將  
泉下相逢也合羞

與党世傑軍判丁亭會飲

望斷西州萬里家又將新火試新茶青油幕下成何事

兩見常山山杏花

古鎮道中

秀拔諸峯鎮海墩  
海水氣兩昏昏  
鷗飛翠竹白沙地  
人宿黃魚紫蟹村  
向背雲山行處路  
淺深潮浦漲來痕  
同游幸有能詩客  
不倦躋攀到石門

李端甫 一首

端甫字濟夫同州人第進士

三王內恕  
及人榜

仕為平定

州軍事判官工於詩有虎迹未乾溪水近樵聲相

答嶺雲深之句子實字師白死於壬辰之亂

太白扇頭

巖冰澗雪謫仙才碧海騎鯨望不回今日霜紈見遺像  
飄然疑自月中來

楊澤州庭秀 二首

庭秀字德懋華州人大定中進士學詩於蘭泉張  
吉甫有渴心曉夢江湖濶醉眼春風草木低之句  
泰和三年刺澤州致仕後閒居鄉里坐為楊珪誣

誤被法士論冤惜之

成臯道中

瘦馬成臯道阻長  
崢嶸冰雪老年光  
九關欲上虎豹怒  
三逕未歸松菊荒  
嵩少雲烟聊駐馬  
漢唐宮殿兩亡羊  
鄭南嶺下梅花發  
千里相思空斷腸

李簡之蓮池集句

一月衰顏幾笑開  
生前相遇且銜杯  
蓮塘十里花如錦  
有底忙時不肯來

孫省元鎮一首

鎮字安常絳州人高才博學嘗中省試魁承安二年五赴廷試賜第以陝令致仕年八十四卒有注東坡樂府歷代登科記行於世弟寧州刺史錡字安世潘原令鉉字安道同榜擢第鄉人榮之號三桂孫氏安常孫詵思美軍府叅佐安世孫處謙志全安道孫蔚今俱在

許氏雙桂堂

許家二桂聯翩秀孫氏三枝次第春盛事若將相比竝  
輸君堂上拜雙親

張著 二首

著字仲揚永安人泰和五年以詩名召見應制稱  
旨特恩授監御府書畫

九日

雨沐天容霽欲流好山誇翠出墻頭黃花憔悴東籬晚  
一段陶家冷淡秋

雨後

西風無意嫪纖雲  
埽盡千峰雨  
脚痕一片秋光清似水  
家家空翠滿柴門

景覃一首

覃字伯仁華陰人年十八有賦聲大定初三赴簾  
試後以病不就舉博極羣書有舉問者立誦數百  
言不休又從而講說之為人誠實樂易不修威儀  
隱居西陽里以種樹為業落托嗜酒醉則浩歌日

以為常作詩有功樂府亦可傳予同年進士王元  
禮嘗從之學說伯仁老不廢書有勸以養目力者  
曰吾輩非讀書則無所用心要當死而後已耳晚  
年於易有所得年七十終於家自號渭濱野叟有  
集傳闕中

感事

蘭芳切禁當門種李苦何傷竝道生自古英雄足猜忌  
莫教身外有浮名



段繼昌

五首

繼昌字子新白水人自號適安居士喜作詩與華  
陰景伯仁相友善家甚貧而世間事皆不以挂口  
有以錢遺之者必盡送酒家名酒曰黃嬌蓋關中  
人謂兒女為阿嬌子新以酒比之故云一日天苦  
寒人有遺之酒者飲不盡而醉夜半忽驚起以衣  
衾覆酒缸僵卧榻上人為言酒自不冰先生將不  
為寒所病乎子新笑曰人病尚可酒病不可療也

其好飲如此臨終辭鄉里託以他適明日卧於党氏園亭大石上視之已逝矣伯仁弔之云適安居士舊知聞廓達靈根厭世紛辭罷親朋便歸去一籌今日又輸君

梨花

一林輕素媚春光透骨濃薰百和香消得太真吹玉笛  
小庭人散月如霜

一溪

一溪流水走青蛇  
春在江邊漁父家  
竹外寒梅看欲盡  
清香移入小桃花

春早二首

魚兒水汎鴨頭綠  
野馬塵飛羊角風  
西崦山家籬落背  
杏梢初見一分紅

又

斷冰銷盡荻芽尖  
凍隴蘇來白薺添  
幾片野雲飛不去  
晚風吹作雨纖纖

讀紀信傳

鹿走中原兩虎爭  
滎陽圍解事堪驚  
當時拔劍論功者  
矢口何人說紀生

岳行甫 二首

行甫字仁老鄜州洛川人在關中最有詩名泰和  
初有以仁老時病詩達之道陵者道陵大加賞異  
授以官不就士論高之舊所傳沾泥柳絮燕銜去  
鎖月梨花鶯喚開本前人詩又苦無佳致世俗識

真者少悞謂仁老所作乃閔傳之曾見仁老詩百餘  
篇佳句甚多續當就秦中好事家搜訪之

謝人惠二小漆冠

規製新翻出杜郎最宜閨子夜燒香不爭寶髻我宮樣  
自與霓裳配道裝細攏翠鬟雲易滿淺銜牙櫛月難藏  
水衡雙寄非無意要買楊枝惱孟光

立春日

銀線青絲翠枕堆爭牛擊鼓欲驚雷翻風鬪巧春頭勝

漉雪浮香臈尾盃迎暖梢梢金著柳逗寒葉葉粉飄梅  
不成一事人空老半百光陰又七迴

迂齋先生周馳

二首

馳字仲才濟南人經學出於醇德先生王廣道賦  
學出於泰山李時亨至於党趙又其忘年友也資  
性古雅而以襟量見稱大定中住太學屢以策論  
魁天下私試亦頻中監元家素饒財鄉人強以子  
弟從之學所得東脩皆散諸生之貧者貞祐之兵

濟南陷不肯降攜二孫赴井死鄉人葬之宅後之  
壽樂堂遼東人吳子英嘗從仲才學能記其所著  
亞父撞玉斗賦及他文數篇

箸詩

章廟御題  
限紅字韻

矢束形何短籌分色盡紅駢頭斯効力失偶竟何功比  
數槃孟側經營指掌中蒸豚挑項鬻湯餅拌油葱正使  
遭讒口何嘗廢直躬上前如許借猶足沃淵衷

戮子

私孟反  
支起也

勿以微才棄安危任不輕誰憐一片小能使四方平几

案由吾正槃盂免爾傾何當遇夷坦沈默更何營

此詩王仲

澤所傳或以為仲澤作也以其與周仲才詩意相近姑附於此以俟更攷

劉太常鐸

七首

鐸字文仲冀州棗強人承安五年進士元光二年

入為太常博士正大初改兵部員外郎以武昌軍

節度副使致仕癸巳歲病歿於京師自號柳溪先

生有集傳于家武成王著作序言文仲生未能言



已識百餘字及授學穎悟過人為人誠實少許可  
不徇流俗不慕榮利益實錄云子敏中宇庭幹亦  
學詩今居洛中

三陽述懷

蟻穴吾猶夢蝸廬此僅容一川青靄合半嶺白雲封地  
僻宜歲拙官閒足養慵只慙無補報潦倒不歸農

即事

亦在三陽時作

地與中州迴民餘上古淳峽長深束渭路險曲通秦煙

金史四  
卷七  
柳千家曉風花百里春一官如自擇閒處著閒身

澠池驛舍用苑極之郎中韻

慣從鞍馬作生涯宿處依依認是家  
爐火相看衣袖暖盤飧未辦驛廚  
諱淹留歲月頭如雪汨沒風塵眼  
更花永夜如何得消遣新詩吟罷  
自煎茶

春日

翠微深處幾人家風颺輕烟雨壓  
沙寒勒野桃開較晚向陽纔有兩  
三花

所見

綸竿老子綠蓑衣  
細雨斜風一釣磯  
正是鄰家社醅熟  
柳條穿得錦鱗歸

讀李訓鄭注傳二首

誰教閹宦作權臣  
肅代優游到敬文  
三子謀疎誰不道  
泄機也合罪劉蕡

又

恭醫入侍本防猜  
偶失機權亦可哀  
陳竇至今佳傳在

莫從成敗論人材

李扶風節 二首

節字正臣涇州人呂造榜進士以詩名關中資性滑稽談笑有味而臨事以幹局稱歷威戎扶風令初名守節哀宗即位去守字哀宗知其名謂侍臣言吾不欲人避上一字李守節何故避之良久曰臣子敬君避之亦可正臣有詩云梧頭打出和糴米丁口簽來自願軍讀之則時政可知矣

漁父

舉世從誰話獨醒  
短蓑輕箬寄餘生  
半篙春水世塵遠  
一笛晚風山雨晴  
稚乳滿船生事簡  
魚蝦到市利源輕  
旁人莫怪機心少  
曾與滄洲白鳥盟

有感

亂離何事最堪傷  
孝子陵前段氏莊  
鑄鐵作門貽鬼笑  
堆金齊斗買天亡  
春風草滿歲書壁  
落日狐鳴打麥場  
惆悵賢郎一丘土  
過車腸痛獨難忘

劉勲 一十三首

勲字少宣本出洛陽元魏遷洛陽二十萬家實雲  
中故其父祖而上為雲中人至少宣客居濟南樂  
其風土遂占籍焉少日住太學與兄譙庭老俱有  
聲場屋間南渡後專於詩學往往為人所傳其先  
世本衣冠家風流蘊藉都無科舉氣見于文字者  
亦然嘗有詩云萬里風沙憐病客幾年刁斗厭寒  
更人憐直道違時好自喜閒身與世疎擊筑漫流

燕客淚佩蘭誰識楚臣心濟南云午風襟袖知秋  
早甲夜闌干得月多又云船行著色屏風裏人在  
回文錦字中百和香薰風過處萬盤珠落雨來時  
此類甚多少宣長於尺牘落筆皆有可觀其樂府  
如暮鵲庭院春陰淡之句尤可喜也

讀張仲揚詩因題其上

布衣一日見明君俄有詩名四海聞楓落吳江真好句  
不須多示鄭叅軍

偶作

將軍馬躍五撾鼓  
客子車行三唱雞  
白髮書生無伎倆  
滿窓紅日醉如泥

杜善甫乞炭

筆口酸嘶解說窮  
寒爐隨手變春紅  
因君大笑涪翁拙  
費盡奇香得馬通

呈呂陳州唐卿

警盜何煩鼓  
夜撾麗譙清  
畫卷高牙春  
回和氣一千里



雪與豐年十萬家  
逋賦稍寬新得帖  
軍書不至早休衙  
新年載酒須行樂  
次第東風遶郡花

秋涼

桃笙乘勢獻微涼  
紈扇無功送暑光  
老病不嫌風露冷  
莫教添作鬢邊霜

愛詩李道人嵩陽歸隱圖

脫却儒冠已自閒  
更令家事勿相關  
百錢便挂青藜杖  
不看先生紙上山

元夜陰晦

逐逐雕鞍趁畫輪年芳樂事一番新  
芙蓉城暖東風夜楊柳樓深笑語春  
兩鬢愁添新白雪十年夢到軟紅塵  
空庭不見梅花月寂莫春陰最惱人

傷曹吉甫之死

官職雖低首不低爭教有志竟空齋  
向人指畫將何語卧壁糊塗不解題  
小女遶牀猶戲劇老兵伏地亦悲啼  
春風繫馬庭前樹只想東齋醉似泥

同趙宜之賦梨花月

雪樹生香淡月邊  
相媒相合鬪清妍  
空庭冷落秋千影  
虛度良宵亦可憐

不寐

酪奴作祟攪秋眠  
追咎前非四十年  
一夜蟲聲相計會  
併催白髮到愁邊

戲鄭秀才

張老豆新頻見餉  
鄭家米鑿不須賒  
客來粥熟吾能辦

要與齊奴鬪咄嗟

春日

粉蝶耽香夢正迷黃峰和蜜計何癡小軒無事誰如我  
卧看楊花點硯池

答仲和

此身安處苦難尋常羨歸鴉易滿林望遠真成廣武歎  
得詩空作洛生吟逢人放適村村酒感物悲哀歲歲心  
想得濟南花正好抱城春水一篙深

李泚  
四首

泚字公渡相人少從王內翰子端學詩能行書工  
畫山水就所長論之詩為長性寬緩笑談有味居  
京師十五年日游貴人之門所至以上客延之善  
處世不為人所忌嫉雅有前輩典刑累舉不第年  
六十餘卒於通許陳留之間

漫書

胸懷平日窓八達伎倆只今龜六歲唯有閒情如老菊

寒花自信晚能香

二老雪行圖

雪明萬仞鄴西山杖履平生幾往還  
滿眼京塵空對畫何時真似兩翁閒

祕書張監墨梅圖

張南人

眼中只有梅千樹不挂世間蜂蝶花  
十載江南春夢斷至今清影在君家

燈下梅影

丁年夜坐眼如魚老矣而今不讀書牆角短檠還有用  
瓦瓶相對一枝疎

秦畧 一十三首

畧字簡夫陵川人父事軻有詩名工作大字簡夫  
少舉進士不中即以詩為業詩尚雕刻而不欲見  
斧鑿痕故頗有自得之趣悼亡一詩高出時輩殆  
荆公所謂看似尋常最奇崛成如容易却艱難者  
耶年六十七卒臨終留詩云軀殼羈棲宅兒孫解

迺恩雲山最佳處隨意著詩蒐簡夫自號西溪老人有集行於世子彥容為黃冠師今在平陽

拳秀峰

平滑石之俗其俗資磨礱磊醜石之秀其秀在醜中正如古大夫貌寢氣質雄又如聖人心孔竅虛明通大都一拳許含蓄華與嵩大巧本若拙足見造化功好處元更多摹寫不易工君其善調護抵擊防兒童

雪行



匹馬東來冰雪天  
蒼山手冷墮吟鞭  
煙中髣髴聞雞犬  
不覺人家到眼前

鳥影過寒塘

著眼分明莫作疑  
從來形影本同歸  
不應水底青天上  
更有飛禽仰面飛

悼亡

自古生離足感傷  
爭教死別便相忘  
荒陂何處墳三尺  
老眼他鄉淚數行  
多事春風吹夢散  
無情寒月照更長

還家恰是新寒節忍見堂空紙挂牆

元日

新歷從頭數殘冬與我違不知垂老至但覺拜人稀  
汲水泥融井看書暖入幃淺情牆外柳新綠已依依

贈趙宜之

年時見君行路難喜於長安新得官日來見君鄰婦哭  
驚似藍田尋得玉愛官愛玉樂有涯愛君之詩無盡期  
古人骨冷不復作主張騷雅非君誰

白髮

臨水時自照照我須與眉須眉何所似恰似純白絲從  
茲一白後寧有再黑時譬如花落地不復還故枝殷勤  
語須眉聽我自解詩幼小癡讀書既壯多憂思自苦有  
冰藥自潤無膏脂勞生到今日汝白將何辭

同希顏裕之賦樂真竹拂子

覓箇龜毛抵死難直教擊碎釣魚竿世人不用生分別  
信手拈來總一般

少室山卓劍峯

神威洗盡世間讐  
電歇雷閒怒氣收  
一柄太阿留少室  
却擎空掌華山頭

此身

此身日日一簞貧  
貧裏留殘自在身  
獨把筇枝行又立  
東風花柳不嗔人

穀靡靡上黨公府作

穀靡靡青割將來強  
半批急忙舂米送官倉  
只恐秋風

馬塵起官倉遠在蕎麥山南梯直上青雲間梯危一上  
八九里之字百折縈迴環憑誰說向監倉使斛面莫教  
高一指請君沿路看擔夫汗顆多於所擔米

麝香

山麝逃風遠谷藏一山行過四山香  
麝堂自養千鈞弩枉怨虞人鼻孔長

趙洛道中

柔青初散隴頭桑村落人家布穀忙  
一段蕪菁渾著角

葉間猶有幾花黃

張琚 二首

琚字子玉河中人父鉉字鼎臣大定中第進士仕至同知定國節度使事子玉刻意於詩五言其所長也如初至華下云老雨梧桐夜孤燈蟋蟀秋客同州云秋風留客館夜雨借僧氍毹詩人喜稱道之至有張五字之目集號韋齋

移河中

畊戰連年廢吾知有此行條山猶在眼渭水若為情飽  
肉豺狼喜傾巢燕雀驚西樓今夜月愁絕是空城

秋夜

人與年華老愁兼節物雙高風梧墮砌久雨竹侵窓客  
簾悲秋卧僧鐘數夜撞更堪衰鬢影蕭颯照寒缸

馬編修天來一首

天來字雲章人止謂之元章介休人黃裳榜經義  
進士博學多技能畫入神品百年以來無出其右

者屏山常言天下辯士有三王仲澤馬元章純甫  
其一也元章住太學十九年貧苦之極人所不能  
堪然其談笑自若也大安初調潁州司候靈壁簿  
召為國史院編修官正大九年病歿於京師年六  
十一劉紹宣有贈詩云波瀾口類談玄駛土木形  
骸與世違疇昔麻鞋見天子只今道服勝朝衣蓋  
實錄也元章多作詩欲別出盧仝馬異之外又多  
用俳體作譏刺語如云木偶衣冠休嚇我瓦伶口



頰欲謾誰嚙骨取肥屠肆狗哺糟得醉酒家猪如  
此之類不得不謂之乏中和之氣至其賦丹霞下  
寺竹云人天解種不秋草欲界獨為無色花雪云  
夜來窓外渾疑月今日牆頭不見山末云先生睡  
起騎驢看太素一游非世間龍門云白含雲竇雪  
青補石門天則知詩者亦當以功揜過耳

山中

青林寂寂鳥闐闐畫出風煙落照間脫却草鞋臨水坐

野雲分我一邊閒

張內翰本一十首

本字敏之觀津人貞祐二年進士工於大篆及八  
分四十歲後學詩詩殊有古意正大九年以翰林  
學士從曹王出質客居燕京長春宮將十年後游  
濟南病卒

得王子正書

晨鵲何處來飛鳴向前除故人在天涯遺我尺素書為

言長相思夢寐同所居所居亦靡他上論揖讓初覺來  
獨愴然淡月留太虛蹇予臨末路世味皆泊如一學未  
敢輟尚念客氣鉏切磋與琢磨政恐朋友疎自從吾子  
東門乏長者車發揮天人奧大辯孰起予丹陽何高明  
吾子昔所廬南軒拂翠筠北潭照紅蕖蝗害非不虐子  
食豈無餘潔江固自佳何堪曳長裾春風旦夕至歸哉  
莫踟躕

寄弟

離離丘壠田鬱鬱霜露思相隔二十年旦暮一何悲中  
途涉萬里天幸復來歸燕安此懷居愧彼神與祇叔兮  
孝且友見義能不疑上念先塋孤亦閔乃兄凝護喪營  
大葬勤苦我所知昨朝尺書來殷勤咸及茲燈下展轉  
讀涕淚沾裳衣父祔失臨穴子馬庸我為我非羽毛寄  
飽食冥然飛田居有素懷行當事畬菑與子奉遺祀沒  
身以為期

梁都運斗南新居落成

購材燕市中作室何翹翹老手為拮据百日不敢驕室  
成僅容膝勃谿益無聊云胡寫予懷惟是風雨宵先生  
名大夫黼衣華四朝楓堂接桂室燕處俱逍遙新築誠  
瑣兮貧飲稱一瓢居之不自陋無乃壯志消孰知君子  
心一念恒萬朝滔滔寧我盈凜凜不我凋處樂及處約  
所以長囂囂里社來落成賤子亦見招槃餐無兼味至  
樂等聞韶我獨何人斯永惟德音昭日居及月諸維此  
心搖搖

中秋雨夕呈君美

怪得秋雲不肯晴天公為惜此杯傾無邊清景關人意  
多事西風送雨聲桂樹婆娑辜勝賞桐枝點滴厭殘更  
殷勤朝鏡休重攬白髮星星又幾莖

九日月中對菊同禧伯郎中賦六首

花上清光花下陰素娥惜此萬黃金一杯寒露三更後  
誰信幽人更苦心

又

九日餘香伴月明一觴亦足暢幽情青樓夜半琵琶語  
不說人間有此清

又

子山牢落去江南賦主悲哀尚一堪只恐秋天聞亦苦

併催紅雨下霜巖

庾信哀江南賦  
唯以悲哀為主

又

病魂招得未渾全瞑倚秋屏豈是禪一夢忽成霜蝶去  
草深三逕若為眠

又

鬼化斯文念賈生精神凋琢坐寒更一書草就渾衣卧  
恨殺東方不肯明

又

龍山戲馬賞秋光多少新詩入錦囊磨滅英雄豈勝數  
千年依舊一花香

申編脩萬全

二首

萬全字百勝高平人兄無夷字百福崇慶二年進



士百勝少有聲太學中貞祐二年乙科調福昌簿  
不赴隱居盧氏山中以讀書為業作詩有靜功然  
不多見也正大中召為史館編脩從行省慶山南  
征道中有詩云回首秋風謝敝廬崎嶇又復逐戎  
車人生行止元無定一葦江湖縱所如不數日溺  
水死人以為識云

病中遣懷

浪走天涯歲月侵病中猶作越人吟野麋本自便豐草

倦鳥寧當忘故林畫像功名元有命乞墦富貴果何心  
幾時真脫塵囂累巖穴尋居不厭深

和陳舜俞詩

開裏那容更刺頭石田茅屋喚歸休杜門便與詩書老  
過隙從教歲月流槃木見容良自媿錯刀相贈若為酬  
酌君安得如川酒醉眼虬螭萬戶侯

崔遵 三首

遵字懷祖北燕人父建昌字曼卿大定二十五年

進士仕至同知武安軍節度使事懷祖事繼母孝  
與人交有終始遲重少語未嘗及人短長少日在  
太學有賦聲南渡後不就舉選居崧山二十年課  
僮僕治生生理亦粗給前輩如趙吏部子文張左  
丞信甫馮亳州叔獻或懷祖丈人行皆與之詩酒  
相往來懷祖喜賓客有醕藉從容文雅使人久與  
之處而不厭也嘗有宿少林詩云青山已有十年  
舊小雪人為三日留其他往往稱是

送裕之官鄧下兼簡仲澤

青燈別酒夜沉沉力負相思自不任  
閒裏更誰留我醉興來無復伴君吟  
一枝仙桂知難擬千頃黃陂未厭深  
為向荊州王粲道安排佳境約相尋

和裕之二首

行李西來便得君相從回首七經春  
君方備悉原思病我亦私憐仲父貧  
底事却成今日別枯腸難著此愁新  
鳶肩火色真將驗馬虎何勞更問辛

又

不幸還能作幸民十年同醉潁川春  
酒船載我雖堪老仕路有時或為貧  
少室山人三日惡夷門紙價一番新  
益知哀樂終年事未唱驪駒鼻已辛

王主簿草一首

草字德新一名著臨潢人以蔭補官  
碌碌筦庫餘三十年正大中以六赴  
廷試賜出身調宜君簿為人有醞藉  
善談笑密公與之唱酬相得甚歡初  
在

太原作詩有赤心遭白眼笑面得嗔拳之句公甚  
愛之有詩寄之云柳塘雲觀千鍾酒笑面嗔拳五  
字詩蓋志此也及第後呈同年云孤身去國五千  
里一第遲人四十年大為閒閒所稱德新交游滿  
天下獨許欽叔與予為莫逆云年七十八終於雲  
中

寄答劉京叔

十年相望惜睽違驚見蘭章墮客扉鄭子已聞畊有谷

榮公誰念老無衣  
水浮落日流無盡  
山礙行雲斷不飛  
千古神州亦吾土  
幾時同采北山薇

衛承慶 一首

承慶字昌叔襄城人父文仲承安中進士以孝友  
淳直稱於鄉里官至文登今年七十餘卒臨終沐  
浴易衣冠與家人訣怡然安坐誦東坡赤壁樂府  
又歌人生如夢以下二句歌闌而逝昌叔資冲澹  
有父風及識路宣叔王逸賓文伯起故其詩似之

感興

十日不出門出門春已好  
竝山花更多十里紅未了  
朝看花尚妍暮看花又老  
鶯紅墮危枝餘香寄芳草  
人生祇如此百年疾過鳥  
安得脫塵寰游戲萬物表

劉昂霄 一十三首

昂霄字景玄別字季房陵川人父俞字彬叔明昌  
二年進士仕為承發司管勾泰和中予識景玄於  
太原人有言是家讀廣記半月能背誦者予未之



許也戲取市人日歷鱗雜米鹽者令讀之一過目  
無脫遺大率景玄之學無所不闢六經百氏外世  
譜官制與兵家所以成敗者為最詳為人細瘦似  
不能勝衣好橫策危坐掉頭吟諷幅巾奮袖談辭  
如雲四座聳聽噤不得語故評者謂承平以來王  
湯臣論人物李之純玄談號稱獨步景玄則兼衆  
人之所獨愈叩而愈無窮不知去古談士為遠近  
餘子不論也嘗用門資敘調慶陽軍器庫使不就

諸公方薦試宏辭而景玄病不起矣臨終夢賦山  
泉云帶雲縈遠澗和月到疎林又云萬里馮唐老  
中年賈傅歸未幾下世年三十七

中秋日同辛敬之魏邦彥馬伯善麻信之元裕  
之燕集三鄉光武廟諸君有詩昂霄亦繼作

積甲原頭漢闕宮登臨還喜故人同超超萬里乾坤眼  
凜凜千年草木風今古消沉詩句裏河山浮動酒杯中  
極知勝日須轟醉更待銀盤上海東

趙村晚望

放眼東原上風煙接渺茫  
林疎出村落野迴散牛羊  
天  
地浮元氣山河半夕陽  
登高一長嘯未覺阮生狂

送裕之往洛陽兼簡孫伯英

洛水嵩山壽樂堂  
每從熱惱得清涼  
竹床石枕應無恙  
尚可分風供十方

題裕之家山圖

萬里神州劫火餘  
九原夷甫有餘辜  
作詩為報元夫子

莫倚家山在畫圖

同敬之裕之游水谷分韻賦詩得荷風送香氣

五字

各賦一首

招提有勝踐日暮一經過何物媚游人微風動池荷

又

尋幽意自愜况與佳人同俗物不到眼談笑來天風

又

敲門看修竹重理舊年夢上山復下山清風管迎送

又

寒泉漱雲根湛然涵鏡光誰知一滴味中有曹溪香

又

迂辛與臞元得句猶有味顏垣斂暝色深竹貯秋氣

暝色

敬之句秋氣  
裕之句也

寄申伯勝三首

直氣南山相與高爭教塵土浣青袍征科頗似曾料理  
差勝叅軍作馬曹

文

執版那能拜下風  
世間禮數困英雄  
狂歌醉舞人誰識  
憔悴通泉郭代公

又

連昌能隔幾牛鳴  
不見令人鄙吝生  
乘興時思一相訪  
劇談豪飲見真情

游五渡谷

南山如碧環缺處  
蒼崖開當年造物手  
辨此何神哉睥睨

晚倚天壁千古封莓苔源源萬斛泉飛出重山來白龍  
三百丈行處鳴春雷巨石若棟宇磊砢相推排跳波與  
濺沫餘怒猶喧飗我來值杪秋萬壑風聲哀黃花雜紅  
樹錦繡紛巖隈奇勝夙所貪欲去仍裴徊題詩還自笑  
媿我非仙材

田紫芝 三首

紫芝字德秀滄州人父齊以蔭為部掾德秀少孤  
養於外家定襄趙氏故多居於忻年十三外祖廣

寧治中命賦麗華引語意驚絕人謂李長吉復生  
資性穎悟一覽萬言年二十讀經傳子史幾徧為  
人疎俊而以蘊藉見稱與同郡王元卿齊名貞祐  
初避兵臺山倉卒為游騎所馳遇害時年二十三  
士論惜之

夜雨寄元敏之昆弟

時年  
十六

醉夢蕭森蝶翅輕一燈無語夢邊明  
虛檐急雨三江浪  
老木高風萬馬兵  
枕簟先秋失殘暑  
湖山徹曉看新晴



對牀曾有詩來否為問韋家好弟兄

亂後登凌雲臺

愁思紛紛不易裁凌雲臺上獨裴回  
亂鴉背著斜陽去寒鴈帶將秋色來  
破屋無煙空碎瓦新墳經雨已蒼苔  
天翻地覆親曾見信得昆明有劫灰

冥鴻亭下第後作

眼底功名一物無飛揚跋扈竟何如  
青雲岐路多辛苦賴得皇家結網疎

王萬鍾

三首

萬鍾字元卿秀容人父甫字用之通經史淳質有  
儒行亦以知醫見稱兄萬石字器玉住太學有賦  
聲用之妻死不更娶二子俱無家室井臼之事率  
親為之貧居陋巷中破屋蕭然不蔽風雨而弦誦  
之聲不絕也元卿少有逸才讀書有後先不欲速  
成詩文間適似其為人客至清談終日人不敢以  
俗事浼之與同郡田德秀齊名號王田評者謂規

製宏博王不及田而瀟灑無塵土氣田亦非王比也元卿嘗有詩寄予關中云千里呂安思叔夜二年社燕伴秋鴻賦梅花云漢宮月下三千額好在春風一抹痕哭吾兄敏之云蘭逕水流三月暮桂林風落一枝春古詩尤蕭散有自得之趣兵火中皆亡失之矣初用之聞北兵入塞即以吾州為不可守去之太原五年不敢歸貞祐二年州破死者十餘萬人而用之亦以是日病歿於太原較其時

皆三月三日巳時也人謂用之先見固可稱然生死定數亦自不能免云元卿父歿之後與其兄居于平晉之金城裏明年兵復至兄被害元卿欲收葬之時游騎充斥親舊勸勿往元卿持不可曰兄死不收留此身欲何用耶流涕而去尋亦被禍時人甚哀惜之元卿長予一月死時年二十七矣

春宵

風尖月細春猶淺酒冷燈昏夜向深人在西軒愁不寐

十年間事總經心

元氏桂軒為敏之賦

簾捲堂前桂子涼  
一軒燈火夜初長  
月中春好元無價  
天上風來別有香  
棠棣一家同映秀  
詞林百世繼餘芳  
閒花野草空無數  
掩盡人間獨擅場

江村風雨圖

秋風撼撼澹林暉  
烟靄昏昏失翠微  
一段蓴鱸江上興  
蓬窻岑寂夢魂飛

雷琯 一十九首

琯字伯威坊州人以薦書從事史館調八作司使  
博學能文時輩少有及者并州人李汾與伯威同  
在史館以高蹇得罪伯威作詩送之頗譏翰林諸  
人不能少忍至與一書生相角逐使之狼狽而去  
有郎君未足留商隱官長從教罵廣文之句又云  
明日春風一杯酒與君同酌信陵墳人甚稱之

信陵館酒間二首

閒過信陵飲有懷信陵君君去日已遠誰憐抱關人徑  
攜一壺酒往酹公子墳墳科久已平墓木幾為薪泉扉  
鎖長夜千載不復晨昔與賢俊遊今為狐兔隣豪貴竟  
安在念之心紛紛有生會歸盡但恐後無聞此意不可  
必且醉梁園春

又

維昔有迂叟樹桐彼高岡殷勤為封植遂欲棲鳳皇桐  
生日已長鳳來殊未央維鳳覽德輝非時詎來翔枝幹

枯以死志願終莫償憶在西周初飛下岐之陽裴回不能去和鳴聲鏘鏘文王既已沒千載徽音亡咄爾叟何為而欲發其光空令枯株上日晏啼鶯鷦

客有自關輔來言秦民之東徙者餘數十萬口攜持負戴絡繹繹山谷間晝食無糗糒夕休無室廬饑羸暴露濱死無幾間有為秦聲寫去國之情者其始則歷亮而宛轉若有所訴焉少則幽抑而悽厲若訴而怒焉及其放也嗚嗚焉悵悵



馬極其情之所之又若弗能任焉者噫秦子父  
母國也而客言如是聞之悲不可禁乃為作商  
歌十章倚其聲以紓予懷且俾後之歌者知秦  
風之所自焉

扶桑西距若華東盡在天王職貢中一自秦原有烽火  
年年選將戍河潼

又

春明門前灞水濱年年此地送行頻今年送客不復返

卷土東來避戰塵

又

盡室東行且未歸  
臨行重自鎖門扉  
為語畫梁雙燕子  
春來秋去傍誰飛

又

灞水河邊楊柳春  
柔條折盡為行人  
只愁落日悲笳裏  
吹斷東風不到秦

又

累累老稚自相攜側耳西風聽馬嘶百死纔能到關下  
仰看猶似上天梯

又

上得關來似得生關頭行客唱歌行虛巖遠壑互相應  
轉見離鄉去國情

又

前歌未停後迭呼歌詞激烈聲嗚嗚天下可能無健者  
不挽天河洗八區

又

折來灞水橋邊柳盡向商於道上栽  
明年三月花如雪  
會有好風吹汝迴

又

行人十步九盤桓巖壑縈迴行路難  
忽到商顏最高處  
一時揮淚望長安

又

西來遷客莫回首一望令人一斷魂  
正使長安近於日

煙塵滿目北風昏

陽夏懷古

短衣匹馬西北來十年去國隨風埃  
解鞍呼酒歌一曲玉鞭倒捉敲金壘  
君不見項王臺昔時崔嵬今已頽  
秋風蕭瑟吹草萊又不見漢王城  
昔時嵒堯今已平寒烟寂寞啼鶯  
徃牧童擡頭學楚聲野老扶犁城上  
畊畊勢不斷楚聲哀行人欲去還  
裴徊劉項英雄安在哉人間俯仰  
易陳迹聞身健在須銜杯

龍德宮

紫簫吹斷綵雲歸十二樓空盡玉梯綵仗竟無金母降  
仙裾猶憶化人攜千年洛苑銅駝怨萬里坤維杜宇啼  
莫倚危闌供極目斜陽更在露盤西

南國

南國春生江水肥烏檣風扇錦帆歸吳兒日暮棹歌發  
驚起鴛鴦相背飛

古意四首

美人傷獨宿窈窕春閨深素手卷翠被當牕調玉琴危  
絃奏苦調清歌抗哀音絃絕歌復咽起作薄命吟妾如  
朱槿花含英愁晏陰郎如青銅鏡照面不照心不怨不  
照心但惜飛光沈且留連理枕莫捲合歡衾儻君回餘  
輝歡盟尚可尋

又

對酒不能飲拊劍自度曲一唱行路難歌與淚相續朝  
為楊朱泣莫作阮籍哭古道盡荊棘新蹊苦蕒菜曲行

違吾心直行傷我足曲直無適從昂頭羨鴻鵠

又

綿綿兔絲草濯濯檉樹枝結根偶相值引蔓纏綿之春  
風一披拂柯葉含榮滋弱質附美蔭百齡擔不違清商  
忽用事霜飈飈已淒豈意百尺條同此寸草萎委蔓失  
所託憔悴徒傷悲知君無歲寒何用相因依

又

賢王悲墜屨賢婦念遺簪重在不亡故微物何所欽嗟



我昔遊友雲路揚徽音詎念宿昔好棄擲各飛沈昔如  
膠投漆今如辰與參桃李雖成蹊諒無松柏心

王亳州賓

三首

賓字德卿亳州人貞祐二年進士由虹縣令入為  
尚書省令史壬辰京城受圍亳州為單父軍楊春  
所據春以事出德卿與故譙縣尉王進反正朝廷  
授進集慶軍節度使德卿同知使事明年夏六月  
車駕幸蔡道出于亳德卿逆謁上與語慰勞者久

之詔行六部尚書事仍賜世爵後數日部曲崔七輩以軍食不給送款執德卿與副使呂鈞往市中鈞且行且拜泣涕不休德卿毅然無所屈大呼曰但殺但殺不能從汝也是日遇害德卿學詩甚力故所得亦多如風生傳令箭星落受降城煙外莫鐘催倦馬林間殘照聚歸鴉倉小軍爭米邨荒虎食牛又贈剛上人云楞嚴讀罷爐烟冷澹坐山堂閱世人言懷云功名不到書生手坐撫吳鉤惜壯

圖題馬丘寺壁云落葉擁窗僧入靜孤燈穿屋客  
吟秋人甚稱之

衛真道中

毳袍落托又西征陌上東風小雪晴草色喚回原燎黑  
冰澌消入水痕清年華荏苒心情減邊事倉皇夢寐驚  
早晚渦南傳吉語一犁煙雨趁春耕

舟中

河伯夸秋漲舟人健晚涼櫓聲搖落月山氣鬱蒼蒼

除夜

落托功名挽不前，圍爐兀坐夜蕭然。  
臘殘畫角東風裏，春到梅花小雪邊。  
守得歲來慵攬鏡，送將窮去自裝船。  
平明點檢人間事，只有詩魔似去年。

李夷

三首

夷字子遷，後改名伋，宛丘人。苦於作詩賦，古鏡云：盤盤古皇州，夢斷繁華歇。一鞭春事忙，畊出隴頭月。土蝕背花昏，蹄涔駭龍蹲。須髯欲張縮，手不

敢捫又云壽光閱人多曾有此客否欽叔諸人甚  
愛之

贈國醫張子和

禁癰喧喧以字行  
麤工往往笑狂生  
天將借手開金匱  
雲本無心到玉京  
歌嘯動成千日醉  
留連翻厭五侯鯖  
祝君莫觸曹瞞怒  
世上青黏要指名

古劍

古柵崖推老雨天  
忽驚神物茁蒲然  
蛇吞元氣蟄千載

金史卷之二十一  
卷七  
龍逐奔霆脫九泉逆首未歸豪賊裏缺歌聊發慨彈邊  
物猶屢出為時用撫匣潛然惜壯年

書淵明傳後

南渡龍孫角禿顛不甘橫斃寄奴弦一襟義氣麾周粟  
滿簡清風削宋年雪徑低迴松落落霜籬健羨菊鮮鮮  
時屯謚輩輕顏節顏厚吾家草木賢

郭邦彥  
六首

邦彥字平叔本鄆縣人僑居陽翟遂占籍焉興定

五年進士調永城簿以退讓見稱生世不幸處於  
頑嚚傲三者之間鬱鬱不自聊年未四十而死寄  
庵先生愛其詩甚嗟惜之

秋夜聞彈箏篴

露重花香飄不遠風微梧葉落無聲倡樓何處教新曲  
夜靜月高絃索鳴

村行三首

棗花初落路塵香燕掠麻池乍頡頏一片雲陰遮十頃

賣瓜棚下午風涼

又

芹葉蘆花岸兩邊  
釣溪石畔落孤鶩  
小畦引入平流水  
麻稈森森已拍肩

又

豆葉芄芄麻葉光  
植禾得雨又催黃  
田家樂事誰真得  
牧子行歌醉叟狂

酒醒



少年驕氣總消磨萬事紛紜夢裏過三載自持葷食戒  
一心還被性宗魔凌烟閣上榮名好聚窟洲邊樂事多  
今日酒酣都忘却亂吟俳語作狂歌

讀毛詩

含氣有喜怒觸物無不鳴天機泄鳥迹文字從此生誰  
言土葦器聲合天地清樸壤犧氏瑟巧露媧皇笙末流  
不可障聲律隨合并徧讀蕭氏選不見真性情怨刺雜  
譏罵名曰離騷經頌美獻諂諛是謂之果銘詩道初不

然自是時代更秦火燒不死此物如有靈至今三百篇殷  
殷金石聲漢儒各名家辯口劇分爭康成獨麾戈諸儒  
約連衡祭酒最後出千古老成精我欲讀爾雅不辨螯  
蟹名尚憐沈謝輩滿篋月露形孔徒凡幾人入室無長  
卿三子論性命舉世為譏評白首草太玄才得覆醬罌  
不如匡鼎說愈笑人愈聽

史學

八首

學字學優延安人凡才字才長住太學有聲學優

正大中省試第一人釋褐舞陽簿辟盧氏令卒官  
妻李氏國初河南尹成之孫女小詩殊有思致學  
優嘗客京師有所眷久而不歸李作詩寄之云百  
年風樹底誰淚到君前學優得詩即日命駕

陪陳彥丈謁筠泉榮上人

才長

強隨禪客到西禪竹柏團青蔭石泉一首小詩吟不就  
閒情元在落花邊

宮詞

學優

寶帶香繡水府仙黃旂彩扇九龍船薰風十里瑤華島  
一派歌聲唱采蓮

默翁溪山橫幅

默翁廬都運  
才卿自號

五雲雛鳳下遼天來作金鸞翰墨仙詩酒償殘鶯館債  
簡書薰破鹿門禪自憐歲月塵中老盡攬溪山筆底傳  
短草疎林秋一幅典刑人物記當年

李道人崧陽歸隱圖

石壁城頭夜斬關軟紅塵底曉催班道人一笑那知許

門外青溪屋上山

晚梅

孤根春半恰春回  
剛逐夭桃艷杏開  
蝶子蜂兒應有語  
東風元不為渠來

七夕

箱牛迴馭錦機閒  
天上悲歡亦夢間  
月夜並肩人不見  
蕭蕭風葉滿驪山

醉後

觀魚暫覺心差樂  
化蝶元來夢亦忙  
得似醉中都放下  
春風自與百花香

過太室

三輔祥開表聖期  
三呼天壽與天齊  
殿楹碧瓦仍唐制  
洞鑠蒼苔失漢題  
柱玉已聞安廟祏  
劍鋒重為剪撐黎  
升中剡有辭臣賦  
滿望鸞旂鳳蓋西

玉柱卓劍  
二峯名

侯冊  
五首

冊字君澤以門資仕與杜仲梁  
張仲經劉京叔游

用是得名嘗作樂府云玉堦春草傷心碧錦瑟華  
年過眼空又云千金買斷青樓月爛醉桃花扇影  
風人多愛之壬辰歲病京師園中作詞云回首鳳  
皇城下路人不見月茫茫明日君澤死其後京城  
亦丘墟矣

寒食

交游零落葉辭柯歲月崢嶸馬注坡燕子不來寒食過  
滿城風雨落紅多

醉中

爛醉歸來驢失脚，破靴指天冠。  
倒卓起來白眼望青天，  
狂氣崢嶸無處著。  
陶潛止酒意，有在鋪糟醖。  
醖良未害君看，  
謝奕對桓溫，得失老兵何足怪。  
螟蛉螺贏待二豪，  
飲中寧有山家濤。  
平明徑訪陳驚坐，相對春風把蟹螯。

學古體

桐風吹月烏啼井，蟾波濕露沉雲影。  
素絲牽玉轉泉華，美人睡覺燕支冷。  
銀鈎挂簾北窗曉，翠鬟臨鏡雙鸞小。



黃衫少年望不來寂寂庭堦滿春草

昨朝

昨朝已作春歸辭今日還成送客詩客子春光俱不見  
落花寂寂閉門時

楚宮

離宮樓閣與天通暮雨朝雲入夢中回首舊時歌舞地  
女蘿山鬼泣秋風

王元粹

三十三首

元粹字子正初名元亮後止名粹平州人系出遼  
世衣冠家年十八九作詩便有高趣性習專固世  
事不以累其業故時輩無能當之者正大未用門  
資叙為南陽酒官遭亂流寓襄陽襄陽破隻身北  
歸寄食燕中遂為黃冠師有十月風霜侵病骨數  
家針線補殘衣之句親舊有憐其孤苦欲為之更  
娶者子正業已高舉主太極道院竟不能自返年  
四十餘癸卯九月病卒詩人淄川楊叔能挽之云

匹婦主中饋雖貧生理存五言造平淡隻影卧黃  
昏漫下陳蕃榻虛沾文舉尊北平家世絕銜恨入  
荒原從弟鬱亦攻詩方之其兄蓋商周矣

春日

時年十八

春日何慘慘春雲何陰陰桃李都未花况乃餘寒侵久  
在城市居而無人見尋讀易了一編靜見天地心貧士  
寡徒侶古來非獨今

臨高

客子臨高秋思生碧山無際暮雲橫但看八月草木落  
未見中原塵全清流景暗徂人易老故園何在夢頻驚  
尊中有物同誰盡正要相看醉膽傾

葉縣贈李長源

相見各異縣歲暮風霜清三日同眠食深見故人情借  
問何所歷大梁與秦京悠悠川途永冉冉歲月傾子當  
東北馳予亦西南征人事相羈束何時當合并聊斟昆  
陽酒為澆胸次平出處固難必勉哉宗令名

送李文起令鄜城

好去鄜城宰當途有薦章長才試縣邑嘉政寄循良遠  
路連秋草征衫帶夕陽濟時公等在吾欲汎滄浪

九日

憑高一望客心傷風景蕭條是楚鄉飛雁欲歸何處去  
幽花還似昔年芳詩因感物聊成詠酒為隨人強舉觴  
十載蹉跎身事晚每逢佳節轉淒涼

壽李長源

匹馬短衣看此行看君誰信是書生聽詩未覺秦川遠  
倚劍長懷晉水清一飯見哀韓信恥千金為壽魯連輕  
壯年休洒新亭淚且為江山灌巨觥

旅次

旅次渾無定生涯亦漫勞病求方士藥寒憶故人袍避  
俗惟黃卷忘憂但濁醪柴門多落葉昨夜朔風高

西山避亂三首

蒼山多回互四望令人迷過午日已暖殘雪融為泥路

滑不可進弱葛愁攀躋老幼委溝壑不如犬與雞嗷嗷  
同行子手中各有攜汲澗為飲食架木為巖栖夜半三  
四驚翁媪禁兒啼念我長病母亂離隔東西

又

野宿不得曉飛霜沾敝袍空山凝寒色天邊星月高憶  
昨離鄂城數家同遁逃穿林恐相失前後聞呼號避亂  
但欲遠焉知登頓勞俯臨萬仞壑性命輕鴻毛

又

青青道邊麥知是誰家田山田固已薄榛石復相連旁  
有破茅屋日入不見烟借問舊居者聞亂已西遷平生  
苦淪薄對此增慨然甲兵暗宇宙誰能安一廛愁憂無  
從訴仰面視蒼天伐木南澗底雙鹿過我前

還鄂城舊居

四月六日作

南風兵塵遠病客返舊居入門顧西壁書籍亦無餘數  
口共嗷嗷日事將何如屋破未暇葺草滿須當鋤昔去  
季冬末今來孟夏初深媿資用絕時時煩里閭



經廢宅

誰家住宅北山隈  
亂後逋人尚未回  
惆悵門前是官道  
臨風一樹杏花開

登鄂城寺樓

亂後行藏豈自由  
此身雖在病兼憂  
一坏徒積黃泉恨  
四壁難為白日謀  
數極乾坤見中否  
跡隨溝壑恐長休  
可憐海內干戈滿  
獨對江山倚寺樓

八月二十三日夜走西山

婦病不能進兒啼不肯行蒼茫荒野外北風鼓鼙聲老  
幼夜中逃失路入榛荆月出天欲曙山頭烽火明鄧卒  
一戰潰敵勢遂縱橫昨朝使帖下主將亦還營嗷嗷二  
十載何時見昇平我生值世亂世亂難為生

哭李長源

十月西來始哭君山中何處有孤墳以才見殺人皆惜  
忤物能全我未聞李白歌詩堪應詔陳琳書檄偶從軍  
窮途無地酬知己會待昇平緝舊文

襄陽七絕句

江雨初晴江漲發涼風吹水波浪開日暮津頭聞打鼓  
越商巴賈卸船來

又

街頭魚米近頗貴縮項長腰最可珍江東蓴鱸亦何好  
能令張翰稱達人

又

近值喪亂棄中原南來亦復著南冠吾家舊井峴山畔

野老謾作北人看

又

襄陽城府自古雄十疊萬瓦當晴空短衣少年何處客  
相邀一醉楚樓中

又

城東大堤堤上頭何處女郎同出遊紫蓋留連不歸去  
唱歌日暮傍汀洲

又

江上小兒誇善沒一日入水知幾回汝曹未有機心在  
緣底鷗鳥不飛來

又

歎息耆舊不復見欲問土風誰為陳羊公遺碑武侯廟  
江邊酒家說向人

武侯廟

武侯祠廟南山曲苔滿荒碑不堪讀客子登臨又一時  
秋色蒼蒼入喬木天下不可無奇材千年精爽安在哉

孤吟裴回不忍去寒日欲下悲風來

萬里

萬里江山動楚吟異鄉風物長年心孤身轉覺乾坤窄  
往事空驚歲月深木落高城初過雁霜飛幽館夜聞砧  
蹉跎未遂東遊計醉後悲歌淚滿襟

醉後

雲自無依鶴自孤此生誰信有窮途干戈二十年來客  
留得殘骸傍酒壚

丹陽東樓

仙人樓居避蒸濕東樓縹緲羣仙集風吹高柏影在衣  
忽驚滿座蛟龍入日晚留連共一觴歸來如夢海生桑  
片雲送雨山頭黑傍水低飛燕子忙

東樓雨中七詩

水邊人去燕爭泥風動綠荷香滿溪高樹遶樓遮望眼  
獨看山色過牆西

又

倚樓人看水東流橋上行人却望樓零落故宮無覓處  
蕭蕭禾黍滿城秋

又

多年蒼柏拂簷枝燕子飛來語向誰枕簟不妨留客住  
滿樓風雨下簾時

又

雨入溪樓不見山雨晴依舊數峰間韋郎詩句王維畫  
好在幽人指顧間



又

庭中野蔓走青蛇  
窗外萱葵亂彩霞  
雲漏斜陽雷漸遠  
東邊飛雨到瓊華

又

好風吹袖覺涼生  
雨後東溪水面平  
無數荷蓮看正好  
却嫌波底亂蛙鳴

又

溝水清泠樹影圓  
下樓閒步上樓眠  
夜來夢裏驚風雨

元是松聲到枕邊

王鬱 一十二首

鬱字飛伯少日作樂府擬古別離有黃鶴樓高雲  
不飛鸚鵡洲寒星已曙之句人多傳之其後入京  
師大為李欽叔所稱與之詩云詩句婉國風下者  
猶楚辭贈詩者甚多有云憶惜潁亭見飛伯恍若  
夢中逢李白又云紫陁仙人今淵雲騎風御氣七  
尺身又云良金元有價白璧況無瑕又云王郎少

年詩境新氣象慘澹含古春  
筆頭仙語復鬼語只有溫李無他人  
飛伯用是頗自貴重云

春日行

春日飛春野寂紅朋碧友元  
胎濕東風著意寒食時遊  
絲粘人困無力小鈴犢車  
讌堤沙鳳簫驚落瓊英花荒  
墳頽頽啼夕鴉草荒月黑鬼思家

寄遠吟

一封征人書秋帆瀟湘岸  
當君高樓醉憶妾空閨嘆

陽關曲

城東車馬已促裝城西江水青茫茫綠楊陌上一杯酒  
離愁慘淡春無光秦樓花映晴烟直誰家少婦當門立  
金鞭入手紫燕嘶回首飛雲晚山碧

傷別曲

蘭皋飛暗塵征車紆去轍長安雖咫尺回首繁華歇故  
人亭下酒蛾眉眼中血平生慷慨腸忽作柔絲結傳聞  
紫塞傍秋烽下危堞班超未投筆來瑱空嚼鐵誰能金

閨中坐眷娟娟月

長安少年行

新月平康金步蓮  
青雲戚里玉連錢  
誰家年少秋風裏  
梁甫吟成抱劍眠

楚妃怨

涼風遶樹秋長河  
絡天碧深宮悄無人  
月暗莎雞泣

古別離

山腰露蕙含天淚  
江林楓葉秋容醉  
夫君八月鴈門行

碎霜冷印白龍轡憶君挑妾初鳴琵琶中已有白頭吟  
朝朝暮暮當時事言之祇足傷人心君不見湘妃二女  
哭舜時煙筠青玉紅珠滋蒼梧人去百想絕忍教今日  
生離別生離別情偏重不及雙飛南浦雲落紅寂寂春  
閨夢

秋夜長

秋風嫋嫋吹庭樹傷心一葉隨風去葉隨風去何所之  
似我年年困羈旅神蜚紆屈泥中蟠青雲未到誰汝憐

愁來不寐起視夜斗柄斜指西南天

折楊柳

長安二月多綠楊遠信未到龍庭旁佳人中夜抱影坐  
風窗冷冷愁思長青天無雲一鏡潔萬戶千門音響絕  
何人橫笛在高樓玉龍叫徹春江月

遊子吟

短日空裴回流雲自來去茫茫曉野客衣單白露無聲  
落秋樹

陽翟贈李司戶國瑞

洛陽賞盡牡丹春，寂寞釣臺對夕暉。  
手折幽蘭贈行子，多情惟有李參軍。

飲密國公諸子家

宣平坊裏榆林巷，便是臨淄公子家。  
寂寞畫堂豪貴少，時容詞客醉琵琶。

中州集卷七